



REPUBLIKA E SHQIPËRISË  
KOMISIONERI PËR MBIKËQYRJEN E SHËRBIMIT CIVIL

Nr. 620/5 Prot

Tiranë, më 11.11.2022

**V E N D I M**

Nr. 134, datë 11.11.2022

**Mbi përfundimin e hetimit administrativ me objekt verifikimin e ligjshmërisë në lidhje me procedimin disiplinor; të drejtën e kushteve të përshtatshme të punës; respektimin e të drejtave dhe detyrimeve të nëpunësit civil; si dhe vlerësimin e rezultateve në punë ndaj inspektorit \*\*\*\*\* dhe \*\*\*\*\*, pranë Inspektoratit Shtetëror të Mbikëqyrjes së Tregut.**

Në mbështetje të kompetencave ligjore të parashikuara në pikën 1, të nenit 11, nenet 14 dhe 15, të ligjit nr. 152/2013, “Për nëpunësin civil”, i ndryshuar, të ligjit nr. 44/2015, “Kodi i Procedurave Administrative i Republikës së Shqipërisë”, si dhe Rregullores “Mbi procedurat e mbikëqyrjes/inspektimit”, miratuar me vendimin nr. 17, datë 11.03.2015, të Komisionerit, pas shqyrtimit të relacionit të Drejtorit të Përgjithshëm të Inspektimit dhe Mbikëqyrjes dhe Drejtorit të Drejtorisë së Inspektimit dhe Hetimit Administrativ, në përfundim të shqyrtimit të dokumentacionit të mbledhur në kuadër të verifikimit të çështjes,

**VËREJ SE:**

Nëpërmjet një informacioni me objekt: “Ankesa lidhur me shkeljet flagrante të ligjit nr. 152/2013 “Për nëpunësin civil”, ndaj inspektorit \*\*\*\*\* dhe \*\*\*\*\*”, janë ngritur pretendime se janë lejuar paligjshmëri lidhur me procedurën disiplinore të zhvilluar nga organi disiplinor, vlerësimin e rezultateve në punë, si dhe me mosrespektimin e disa prej të drejtave dhe detyrimeve të nëpunësit civil, ndër të cilat: “E drejta e kushteve të përshtatshme të punës dhe e drejta e mbrojtjes nga shteti” dhe “Detyrimi i përgjegjshmërisë dhe refuzimit të urdhrave të paligjshëm”, parashikuar respektivisht nga nenet 33 dhe 43, të ligjit nr.152/2013 “Për nëpunësin civil”, i ndryshuar.

Duke marrë shkas nga sa më sipër, bazuar në nenin 16, të Kreut III, “*Procedura paraprake*”, të Rregullores “*Mbi procedurat e mbikëqyrjes/inspektimit*”, miratuar me vendimin nr. 17, datë 11.03.2015, të Komisionerit për Mbikëqyrjen e Shërbimit Civil, u administrua dokumentacioni shkresor që shoqëronte kërkesën e nëpunësve të proceduar, dokumentacioni i përcjellë me shkresën nr. 3440/1 prot, datë 22.09.2022, nga Inspektorati Shtetëror i Mbikëqyrjes së Tregut, me lëndë: “*Kthim përgjigje shkresës nr. 620/1, datë 13.09.2022*”, i pasqyruar në procesverbalin e konstatimit datë 22.09.2022, si dhe dokumentacioni i përcjellë nga ky institucion me shkresën nr. 3801/1 prot, datë 06.10.2022, me lëndë: “*Kthim përgjigje*”.

Në përfundim të shqyrtimit të materialeve të mësipërme, rezulton e vërtetuar se me shkresën nr. 3110 prot, datë 24.08.2022, me lëndë: “*Relacion mbi veprimtarinë e inspektorëve \*\*\*\*\* dhe \*\*\*\*\**”, Drejtori i Drejtorisë së Pronësisë Intelektuale, pranë Inspektoratit Shtetëror të Mbikëqyrjes së Tregut, në cilësinë e eprorit direkt, ka konstatuar veprime dhe mosveprime që vijnë në kundërshtim me pikën 3/a, të nenit 57, të ligjit nr.152/2013 “*Për nëpunësin civil*”, i ndryshuar, duke i klasifikuar si shkelje të rënda, si dhe duke propozuar nisjen e ecurisë disiplinore për nëpunësit civilë \*\*\*\*\* dhe \*\*\*\*\*.

Në këtë përfundim është arritur nga evidentimi i praktikës së inspektimit të subjektit “*Computer Resale Center (C.R.C)*”, me NIPT K82415008M, me nr. 3099 prot, datë 22.08.2022, realizuar më datë 23.08.2022, kontrolli i praktikës së inspektimit të subjektit “*PC Store Albania*”, me NIPT L01606034A, me nr. 3029 prot, datë 15.08.2022, si dhe nga kontrolli i praktikës së inspektimit të subjektit “*Globe Shops*”, me nr. 3030 prot, datë 15.08.2022.

Me shkresën nr. 3110/1 prot, datë 24.08.2022, të titullarit të institucionit, me lëndë: “*Njoftim për fillim ecurie disiplinore*”, nëpunësit civilë kanë marrë dijeni duke u njoftuar për shkeljen e rëndë të pretenduar se është kryer prej tyre, si dhe për të drejtat e parashikuara nga pika 13, e Kreut II, të vendimit nr. 115, datë 05.03.2014, të Këshillit të Ministrave, “*Për përcaktimin e procedurës disiplinore dhe të rregullave për krijimin, përbërjen e vendimmarrjen në Komisionin Disiplinor në shërbimin civil*”, ku përfshihen:

- paraqitja me shkrim dhe sqarimet rreth kësaj shkeljeje dhe respektimin e afatit kohor që është data 01.09.2022, brenda së cilës duhet të paraqiten këto sqarime dhe argumentat mbështetëse;
- zhvillimi i seancës dëgjimore për shqyrtimin e shkeljes disiplinore në datën 02.09.2022, në ambientet e ISHMT-së, salla e mbledhjeve, ora 11:00;
- njohja e dosjes së procedimit;

- e drejta për t'u dëgjuar vetë apo me përfaqësues ligjor, për të paraqitur dëshmitarë, për të paraqitur prova apo për të kërkuar marrjen e tyre, me paralajmërimin e vazhdimin të ecurisë disiplinore në mungesë, në rast mosparaqitjeje personalisht apo përmes përfaqësuesit ligjor pas njoftimeve.

Në ushtrim të së drejtës ligjore për të paraqitur sqarimet rreth shkeljes së pretenduar në ngarkim të tyre, nëpunësit civilë \*\*\*\*\* dhe \*\*\*\*\* kanë paraqitur me shkrim në një akt të përbashkët kundërshtimet përkatëse mbi shkeljen disiplinore të konstatuar në ngarkim të tyre, përmes shkresës nr. 3113/2 prot, datë 31.08.2022, me lëndë: *“Relacioni shpjegues mbi ecurinë disiplinore ndaj inspektorëve \*\*\*\*\* dhe \*\*\*\*\*”*, drejtuar Komisionit Disiplinor.

Bazuar në pikën 2, të nenit 59, të ligjit nr. 152/2013, *“Për nëpunësin civil”*, i ndryshuar, pikës 1 dhe 2, të Kreut I, të vendimit nr. 115, datë 05.03.2014, të Këshillit të Ministrave, *“Për përcaktimin e procedurës disiplinore dhe të rregullave për krijimin, përbërjen e vendimmarrjen në Komisionin Disiplinor në shërbimin civil”*, si dhe bazuar në relacionin nr. 3110 prot, datë 24.08.2022, nëpërmjet urdhrit nr. 191, datë 24.08.2022, protokolluar me nr. 3113 prot, datë 24.08.2022 *“Për ngritjen e komisionit disiplinor”*, është proceduar me ngritjen e Komisionit Disiplinor, i përbërë nga:

- \*\*\*\*\* , Drejtor i Drejtorisë Teknike, e cila kryeson komisionin;
- \*\*\*\*\* , Drejtori i Drejtorisë së Pronësisë Intelektuale, në rolin e epërorit direkt;
- \*\*\*\*\* , Përgjegjëse e Sektorit të Pronësisë Industriale;
- \*\*\*\*\* , Drejtor në Drejtorinë e Financës dhe Shërbimeve Mbështetëse, drejtues i Njesisë së Burimeve Njerëzore;
- Përfaqësuesi i DAP, \*\*\*\*\* , i caktuar si përfaqësues, përmes autorizimit nr. 5078 prot, datë 01.09.2022, të Departamentit të Administratës Publike;

Përbërja e Komisionit Disiplinor vlerësohet në përputhje me përcaktimet e pikës 2, të Kreut I, të vendimit nr. 115, datë 05.03.2014, të Këshillit të Ministrave, *“Për përcaktimin e procedurës disiplinore dhe të rregullave për krijimin, përbërjen e vendimmarrjen në Komisionin Disiplinor në shërbimin civil”*. Anëtarët e Komisionit Disiplinor kanë nënshkruar deklaratën *“Për vlerësimin e paanshmërisë së anëtarëve të Komisionit Disiplinor”*, në kuptim të nenit 37, të ligjit nr. 44/2015, *“Kodi i Procedurave Administrative të Republikës së Shqipërisë”*.

Inspektorati Shtetëror i Mbikëqyrjes së Tregut, me shkresën nr. 3113/1 prot, datë 25.08.2022, me lëndë: *“Përcjellje dokumentacioni lidhur me fillimin e procedimit disiplinor dhe caktim përfaqësuesi të Departamentit të Administratës Publike në Komisionin*

*Disiplinor*”, ka njoftuar Departamentin e Administratës Publike mbi caktimin e një përfaqësuesi në cilësinë e anëtarit të Komisionit Disiplinor, si dhe mbi rendin e ditës së seancës së organit disiplinor (KD), të caktuar për t’u zhvilluar më datë 02.09.2022, ora 11:00, në sallën e mbledhjeve pranë ISHMT, referuar pikës B/1, të udhëzimit nr. 01, datë 02.04.2014, të Departamentit të Administratës Publike “*Për elementët kryesorë proceduralë dhe materialë të ecurisë dhe shqyrtimit të shkeljeve disiplinore*”.

Seanca dëgjimore e caktuar për t’u zhvilluar më datë 02.09.2022, për nëpunësit civilë \*\*\*\*\* dhe \*\*\*\*\* , referuar shkresës nr. 3110/1 prot, datë 24.08.2022, me lëndë: “*Njoftim për fillim ecurie disiplinore*”, është pasqyruar respektivisht në procesverbalet përkatëse nr. 3110/2 prot, datë 02.09.2022 dhe nr. 3110/3 prot, datë 02.09.2022, referuar nenit 16, të ligjit nr. 8480, datë 27.5.1999 ”*Për funksionimin e organeve kolegjiale të administratës shtetërore dhe enteve publike*”.

Për shkak të mungesës së një anëtari të Komisionit Disiplinor, \*\*\*\*\*/Përgjegjëse e Sektorit të Pronësisë Industriale, është vendosur shtyrja e seancës për në datën 06.09.2022, referuar pikës C/2, të udhëzimit nr. 01, datë 02.04.2014, të Departamentit të Administratës Publike “*Për elementët kryesorë proceduralë dhe materialë të ecurisë dhe shqyrtimit të shkeljeve disiplinore*”, duke njoftuar subjektet e procedimit disiplinor me shkresën nr. 3110/4 prot, datë 02.09.2022.

Seanca e Komisionit Disiplinor e shtyrë për t’u mbajtur më datë 06.09.2022, mbi nëpunësit civilë \*\*\*\*\* dhe \*\*\*\*\* , konstatohet të jetë zhvilluar përsëri pa praninë e anëtarit \*\*\*\*\*/Përgjegjëse e Sektorit të Pronësisë Industriale, pasqyruar në procesverbalet përkatëse nr. 3110/5 prot, datë 06.09.2022 dhe nr. 3110/6 prot, datë 06.09.2022, por seanca e zhvilluar konsiderohet e rregullt nga pikëpamja ligjore, referuar pikës C/2, të udhëzimit nr. 01, datë 02.04.2014, të Departamentit të Administratës Publike “*Për elementët kryesorë proceduralë dhe materialë të ecurisë dhe shqyrtimit të shkeljeve disiplinore*”, sipas së cilës: “*Në rast se edhe në mbedhjen e dytë ka mungesa të anëtarëve të KD, por janë të pranishëm më tepër se gjysma e tyre, deklarohet zhvillimi i mbledhjes së KD-së*”, si dhe pikës 1, të nenit 11, të ligjit nr.8480, datë 27.5.1999 ”*Për funksionimin e organeve kolegjiale të administratës shtetërore dhe enteve publike*”, sipas së cilës “*Mbledhja e organit kolegjial, është e vlefshme kur janë të pranishëm më shumë se gjysma e anëtarëve të tij*”.

Në procesverbalet nr. 3110/8 prot, datë 12.09.2022 dhe nr. 3110/7 prot, datë 12.09.2022, është pasqyruar rezultati i votimit nga anëtarët e Komisionit Disiplinor me pesë vota pro mbi caktimin e masës disiplinore të propozuar ndaj nëpunësve civilë \*\*\*\*\* dhe \*\*\*\*\* , “*Mbajtjen e 1/8 (një e teta) të pagës së plotë për një periudhë 3 (tre) muaj*”.

Komisioni Disiplinor ka përfunduar procedurën disiplinore në ngarkim të nëpunësve civilë \*\*\*\*\* dhe \*\*\*\*\* , me detyrë “Inspektor”, në Sektorin e të Drejtës së Autorit, në Drejtorinë e Pronësisë Intelektuale, pranë Inspektoratit Shtetëror të Mbikëqyrjes së Tregut me marrjen e vendimeve përfundimtare respektivisht nr. 4, datë 16.09.2022, me nr. 3535 prot, datë 16.09.2022, dhe nr.5, datë 16.09.2022, me nr. 3536 prot, datë 16.09.2022, duke vendosur dhënien e masës disiplinore “Mbajtjen e 1/8 (një e teta) të pagës së plotë për një periudhë 3 (tre) muaj”.

Komisioneri konstaton se vendimi përfundimtar nr. 4, datë 16.09.2022 dhe nr. 5, datë 16.09.2022, është shpallur dhe arsyetuar brenda afateve të parashikuara nga udhëzimi nr. 01, datë 02.04.2014, të Departamentit të Administratës Publike “Për elementët kryesorë proceduralë dhe materialë të ecurisë dhe shqyrtimit të shkeljeve disiplinore” dhe përmban elementët e detyrueshëm të formës të parashikuar nga ky udhëzim, pika 19, e Kreut II, të vendimit nr. 115, datë 05.03.2014, të Këshillit të Ministrave, “Për përcaktimin e procedurës disiplinore dhe të rregullave për krijimin, përbërjen e vendimmarrjen në Komisionin Disiplinor në shërbimin civil”, si dhe nga neni 99 e 100, të ligjit nr. 44/2015, “Kodi i Procedurave Administrative të Republikës së Shqipërisë”.

Vendimi përfundimtar nr. 4, datë 16.09.2022 dhe nr. 5, datë 16.09.2022, i Komisionit Disiplinor i është njoftuar rregullisht me shkresën nr. 3535/1 prot, datë 16.09.2022, nëpunësit civil \*\*\*\*\* dhe me shkresën nr. 3536/1 prot, datë 16.09.2022, nëpunësit civil \*\*\*\*\* , njësisë së menaxhimit të burimeve njerëzore të institucionit dhe Departamentit të Administratës Publike.

Sa më sipër, rezulton se procedimi disiplinor i filluar ndaj nëpunësve civilë është zhvilluar konform legjislacionit në fuqi, në kuadër të një procesi të rregullt ligjor, duke garantuar të drejtat procedurale të subjektit.

Pretendimi i ngritur nga palët se asnjë nga anëtarët e Komisionit Disiplinor nuk është ekspert i të drejtës së autorit e për rrjedhojë është e pamundur të kryhet një vlerësim i drejtë dhe i paanshëm prej tyre, Komisioneri vlerëson se vjen në kundërshtim me kuadrin ligjor. Referuar Kreut I, të vendimit nr. 115, datë 05.03.2014, të Këshillit të Ministrave, “Për përcaktimin e procedurës disiplinore dhe të rregullave për krijimin, përbërjen e vendimmarrjen në Komisionin Disiplinor në shërbimin civil”, përcaktohen në mënyrë shteruese cilësitë e anëtarëve të Komisionit Disiplinor për institucionet e administratës shtetërore, institucionet e pavarura, bashkitë dhe qarqet, si dhe për komunat.

Lidhur me pretendimin tjetër të nëpunësve të proceduar, mbi mbrojtjen e sekreteve tregtare të evidentuara në procesverbalet e inspektimit, Komisioneri çmon me rëndësi të theksojë se

në zbatim të pikës 2, të nenit 44, të ligjit nr. 152/2013, *“Për nëpunësin civil”*, i ndryshuar dhe të parimit të mbrojtjes së të dhënave, të parashikuar nga neni 9, i ligjit nr. 44/2015, *“Kodi i Procedurave Administrative të Republikës së Shqipërisë”*, organi publik ka të drejtë që të njihet gjatë procedurës administrative me të dhëna personale apo me të dhëna që lidhen me veprimtarinë tregtare ose profesionale, të cilat mbrohen sipas legjislacionit në fuqi për mbrojtjen e të dhënave personale, duke patur njëkohësisht detyrimin të ndërmarrë masa lidhur me mbrojtjen, ruajtjen, mospërhapjen, si dhe konfidencialitetin e tyre. Detyrimi për mbrojtjen, ruajtjen, mospërhapjen, si dhe konfidencialitetin shtrihet edhe mbi nëpunësin publik, gjatë edhe pas mbarimit të ushtrimit të detyrës.

Lidhur me pretendimin e ngritur prej nëpunësve në fjalë se nga ana e drejtuesve u është kërkuar të veprojnë për të zbatuar urdhra abuzivë, pa shkrim apo verbalë, Komisioneri vëren se në zbatim të pikës 2 dhe 3, të nenit 43, të ligjit nr. 152/2013 *“Për nëpunësin civil”*, i ndryshuar, parashikohet se: *“Nëpunësi civil ka detyrimin të veprojë në përputhje me urdhrat e marrë nga eprorët hierarkikë, sipas ligjit dhe rregullave të brendshme të institucionit”*, si dhe *“Nëse nëpunësi civil ka dyshime për paligjshmërinë e urdhrat të eprorit, ai nuk e zbaton urdhrin, por informon pa vonesë eprorin e personit që ka dhënë urdhrin dhe kërkon konfirmimin e tij me shkrim”*, çka në rastin konkret nuk rezulton të jetë vepruar sipas këtij rregullimi ligjor.

Sa i përket akteve verbale, referuar nenit 98, të ligjit nr. 44/2015, *“Kodi i Procedurave Administrative të Republikës së Shqipërisë”*, përcaktohen qartë format e akteve administrative, si dhe vlen të theksohet se në përmbajtjen e nenit 22 dhe 23, të ligjit nr. 90/2012 *“Për organizimin dhe funksionimin e administratës shtetërore”*, evidentohen në mënyrë të shprehur rastet e mbikëqyrjes së institucionit të varësisë, personi përgjegjës për mbikëqyrjen dhe masat që mund të ndërmerren në rastet kur ngrihen pretendime mbi ligjshmërinë dhe përshtatshmërinë e veprimeve administrative.

Në lidhje me pretendimin tjetër mbi mosplotësimin e kushteve të punës, referuar informacionit të përcjellë me shkresën nr. 3440/1 prot, datë 22.09.2022, nga Inspektorati Shtetëror i Mbikëqyrjes së Tregut, me lëndë: *“Kthim përgjigje shkresës nr. 620/1, datë 13.09.2022”*, nga nëpunësit civilë \*\*\*\*\* dhe \*\*\*\*\* nuk është ngritur asnjë pretendim as gjatë kohës që kanë ushtruar funksionet në ISHMT ashtu dhe gjatë procedimit disiplinor për kushte të papërshtatshme pune apo të jenë urdhëruar në formë dhe mënyrë të paligjshme për kryerjen e detyrave.

Sa më sipër, lidhur me pretendimet mbi kushtet e punës apo detyrimin për të zbatuar urdhra abuzivë, apo verbalë, në zbatim të pikës 1, të nenit 82, të ligjit nr. 44/2015, *“Kodi i Procedurave Administrative të Republikës së Shqipërisë”*, barra e provës për faktet e

pretenduara bie mbi palën, pavarësisht nga detyrimi i organit publik për të vënë në dispozicion të palëve provat e zotëruara prej tij. Në këtë kuptim, nëpunësit civilë nuk kanë paraqitur asnjë akt, dokument apo kërkesë, përmes së cilave mund të provojnë faktet mbi të cilat mbështesin pretendimet e tyre.

Lidhur me pretendimet e nëpunësve civilë mbi parregullsi në procesin e vlerësimit të rezultateve në punë, Komisioneri konstaton se për nëpunësit civilë \*\*\*\*\* dhe \*\*\*\*\* , është kryer procesi i vlerësimit të rezultateve në punë për periudhën e vlerësimit 01.01.2022-30.06.2022, nga Drejtori i Drejtorisë së Pronësisë Intelektuale, i cili në cilësinë e eprorit direkt, ka vepruar në rolin e zyrtarit raportues, për shkak të liritimit nga detyra të Përgjegjësit të Sektorit të së Drejtës së Autorit, në Drejtorinë e Pronësisë Intelektuale.

Përgjegjësi i Sektorit të së Drejtës së Autorit me aktin e dorëheqjes nr. 745, datë 01.04.2022, është liruar nga detyra me urdhrin nr. 99, me nr. 1085 prot, datë 20.04.2022 “Për lirim nga detyra”, i cili i ka sjellë efektet më datë 29.04.2022. Përgjegjësi i Sektorit të së Drejtës së Autorit, në cilësinë e eprorit të drejtpërdrejtë nuk ka realizuar procesin e vlerësimit të rezultateve në punë për nëpunësit në vartësi, për periudhën gjatë së cilës ka ushtruar detyrën, në zbatim të detyrimit të parashikuar nga pika 6, e Kreut III, të vendimit nr. 109, datë 26.02.2014, të Këshillit të Ministrave “Për vlerësimin e rezultateve në punë të nëpunësve civilë”, i ndryshuar.

Drejtori i Drejtorisë së Pronësisë Intelektuale, që ka vepruar në cilësinë e zyrtarit raportues, në kryerjen e vlerësimit të rezultateve në punë për nëpunësit civilë \*\*\*\*\* dhe \*\*\*\*\* nuk ka dhënë shpjegime dhe nuk ka bërë komentet përkatëse në pikat e **Ndarjes C** dhe të **Ndarjes Ç**, të formularit të vlerësimit të punës për nëpunësit civilë të kategorisë ekzekutive.

Për më tepër, nga shqyrtimi në tërësi i formularit të vlerësimit të punës për nëpunësit civilë, konstatohet se në aktin e vlerësimit që është duke u shqyrtuar, është plotësuar edhe rubrika e aftësisë menaxheriale për nëpunësit në pozicionet e nivelit të ulët dhe të mesëm drejtues - aftësia për të përdorur me efektshmëri burimet financiare dhe njerëzore, rubrikë e cila plotësohet vetëm për nëpunësit civilë të nivelit të ulët dhe të mesëm drejtues dhe jo për nëpunësit civilë të kategorisë ekzekutive, të cilës i përkasin nëpunësit civilë në rastin konkret.

Procesi i vlerësimit të rezultateve në punë për nëpunësit civilë \*\*\*\*\* dhe \*\*\*\*\* ka përfunduar me vlerësimin e përgjithshëm niveli “**Kënaqshëm (3)**”, megjithëse në arsyetimin e bërë prej tij, zyrtari raportues është shprehur se: “*Nëpunësi ka*

*realizuar objektivat e punës së tij në kohën e duhur, me seriozitet, përgjegjshmëri dhe korrektësi dhe ka treguar një sjellje dhe qëndrim profesional të mirë”.*

Niveli i vlerësimit “**Kënaqshëm (3)**” nuk është si rrjedhojë e drejtpërdrejtë e arsytimit të përdorur nga zyrtari raportues dhe ka mospërputhje haptazi midis nivelit të vlerësimit dhe arsytimit të përdorur, i cili i për afrohet nivelit të vlerësimit “**Mirë (2)**”.

Për sa u përket më sipër, në kuadër të verifikimit të ligjshmërisë së pretendimeve mbi procedimin disiplinor, të drejtën e kushteve të përshtatshme të punës, si dhe mbi detyrimin e përgjegjshmërisë dhe refuzimit të urdhrave të paligjshëm, nuk janë konstatuar veprime apo mosveprime që vijnë në kundërshtim me legjislacionin e shërbimit civil.

Lidhur me pretendimet e parashtruara për procesin e vlerësimit të rezultateve në punë, duke patur parasysh qëllimin e tij, parashikuar nga pika 1, e Kreut II, të vendimit nr. 109, datë 26.02.2014, të Këshillit të Ministrave “*Për vlerësimin e rezultateve në punë të nëpunësve civilë*” i ndryshuar, çmohet se ky proces duhet të konsiderohet se përmban element kundërligjshmërie dhe për rivendosjen e gjendjes së ligjshmërisë procesi i vlerësimit si më sipër, duhet përsëritet në përputhje me kërkesat ligjore.

#### **PËR KËTO ARSYE:**

Në mbështetje të kompetencës së përcaktuar në nenin 11, pika 1, nenet 14 dhe 15, të ligjit nr. 152/2013, “*Për nëpunësin civil*”, i ndryshuar, në ligjin nr. 44/2015, “*Kodi i Procedurave Administrative të Republikës së Shqipërisë*”, si dhe në mbështetje të nenit 16, pika 6, e Rregullores, “*Mbi procedurat e mbikëqyrjes/inspektimit*”, miratuar me vendimin nr. 17, datë 11.03.2015, të Komisionerit për Mbikëqyrjen e Shërbimit Civil,

#### **VENDOSA:**

1. Të kërkoj nga ana e njësisë së burimeve njerëzore të institucionit, marrjen e masave të menjëhershme për përsëritjen e procesit të vlerësimit nga ana e zyrtarit raportues, Drejtori i Drejtorisë së Pronësisë Intellektuale, së bashku me zyrtarët kundërfirmues dhe autorizues, për nëpunësit \*\*\*\*\* dhe \*\*\*\*\*, për periudhën e vlerësimit 01.01.2022-30.06.2022, duke respektuar me korrektesë dhe koherencë, kërkesat e legjislacionit të shërbimit civil dhe duke evituar parregullsitë e përshkruara në pjesën e mësipërme të këtij vendimi.
2. Për kryerjen e veprimeve administrative, sipas pikës 1 të këtij vendimi, lihet afat 20 ditë, nga marrja dijeni për këtë vendim.



3. Me kalimin e këtij afati, Komisioneri për Mbikëqyrjen e Shërbimit Civil duhet të njoftohet me shkrim, në lidhje me zbatimin e këtij vendimi.
4. Në rast të mos respektimit të këtij vendimi, përgjegjësia do të jetë personale e subjekteve, që nuk kanë kryer detyrimet e lëna në këtë vendim dhe në zbatim të përcaktimeve të pikës 2, të nenit 15, të ligjit nr. 152/2013, “*Për nëpunësin civil*”, të ndryshuar, Komisioneri do të vijojë procesin për rregullimin e shkeljeve të konstatuara, duke përdorur mjetet ligjore për të rikthyer ligjshmërinë në administrimin e shërbimit civil, nëpërmjet gjobitjes së nëpunësit përgjegjës për moszbatimin e masave të përcaktuara në dispozitivin e vendimit.
5. Të njoftohet për këtë vendim Departamenti i Administratës Publike, Inspektorati Shtetëror i Mbikëqyrjes së Tregut dhe nëpunësit \*\*\*\*\* dhe \*\*\*\*\*.
6. Ky vendim hyn në fuqi menjëherë.

**KOMISIONERI**

**Pranvera Strakosha**